

# DIDZA' BURÓP BSÖLĚ'Ě

## PABLO YÖDZ CORINTO

---

**Pablo rugapë' Dios bunách  
queë' Cristo nacu'ë Corinto**

**1** Neda', Pablo, naca' gbaz  
queë' Jesucristo le rë'nne' cni  
Dios. Runbi' neda' tsaxón bi'i  
böchi'ru' Timoteo. Rugapa' Dios  
lbi'ili', rudubli' queë' Dios lu yöd  
Corinto, len yúgu'tëli' náquili' quizi  
queë' Dios luyú Acaya. <sup>2</sup>Rnabda'-në'  
Xuzru' Dios len Xanru' Jesucristo  
uzá' ladxë'ë queëli' len gunë' ga soa  
dxi icj ládxi'dau'li'.

**Yugu' le gzxaca' gdi'ë Pablo**

<sup>3</sup>Yöl-la' ba Dios, Xuzë' Xanru'  
Jesucristo, le naquë' Xuzru',  
ruhuechi' ladxë'ë rë'u, len naquë' ca'  
Dios, ruhuí' xónteczë' rë'u. <sup>4</sup>Ruhuí'  
zxönë' rë'u Dios cati' rac bíti'tëz bi  
rac queëru', quië gac hui' zxönru' ca'  
nup bi rac quegac. Ruhuí' zxönru'  
lequë' ca na' ruhuí' zxönë' rë'u Dios.

<sup>5</sup>Tsca ta'yán le rzaca' rguiru',  
ca na' gzxaca' gdi'ë Cristo, lëzca'  
cni ta'yán le tu'huí' zxön rë'u, le  
nacru' tuz len Cristo. <sup>6</sup>Qui lë ni  
na', chqui' bi rzaca' rguitu', rac  
cni queëtu' quië gac hui' zxöntu'  
lbi'ili' len guntu' ga ulali'. Chqui'  
Dios ruhuí' zxönë' netu', rac

cni quië gac hui' zxöntu' lbi'ili',  
ati' lu yöl-la' rböz zxön ladxí'  
queëli', gac gua' glenli' yugu' le  
saca' qui'li', ca na' rac ca' queëtu'.  
<sup>7</sup>Ruzxöni ládxi'tu'-në' Dios  
gúnteczë' ga gac dxi'a queëli',  
le nózitu' ca na' rzaca' rguili'  
tsaxón len netu', lëzca' cni ruzi'li'  
xbey tsaxón len netu' le ruhuí'  
zxönë' rë'u Dios.

<sup>8</sup>Rë'nitu' gnözili', böchi'  
lza'adau', ca nac le zian le glac  
queëtu' luyú Asia. Gdödti bë'i  
lë na' guc queëtu', guc zi'tër  
ca le guc gua' glentu'. Ca' guc,  
cutur bentu' löz soatu' gbantu'.  
<sup>9</sup>Gúquitu' guc queëtu' ca rac  
quequë' bönni' chnarugu quequë'  
latië'. Guc cni queëtu' cui uzxöni  
ládxi'tu' la' cuinztu', san uzxöni  
ládxi'tu'-në' Dios, Nu ruspán nup  
chnatgac. <sup>10</sup>Dios buslé' netu' lu lë  
na' ben ga gzoa banádx gattu', ati'  
ruslé' netu' yugu' dza. Runtu' löz  
uslé' netu' Lë' cni leyúbl <sup>11</sup>chqui'  
gáclenli' netu', ulidzli'-në' Dios  
gnábili'-në' gáclenë' netu'. Dios  
gunë' ca na' gnábili'-në' tsaxón  
len bunách zian, uzá' ladxë'ë  
queëtu', ati' la'ná xclenë' Dios uláz  
queëtu'.

**Rguíxjö'ë Pablo bizx quië  
rdzeynë' gdxinë' Corinto**

<sup>12</sup>Lë ni le run ga rudzjítu'. Bò naccztu' ruluí'í netu', len yöl-la' ba'a ladxí' queëtu' len gdu ládxi'tu' runtu' bi runtu' yödzyú ni, len cni bentu' ca' ga ni' zoali'. Cni bentu', le guclen netu' le buzá' ladxë'ë queëtu' Dios, len clëg len yöl-la' rejni' queëztu' bentu' cni. <sup>13</sup>Ruzujtu' queëli' lu guich tuz le gac ulabli' len le gac tséjni'li'. Rac ladx'a tséjni'li' gdu <sup>14</sup>lë na' réjni'li' lati'. Ni'r cati' gdxin dza huödë' Xanru' Jesucristo, gac gunli' netu' zxon ca na' netu' guntu' lbi'ili' zxon.

<sup>15-16</sup>Le bena' löz lë ni, gza' ladx'a'a guida' ga zoali' zi'al cati' gdöda' luyú Macedonia, ati' guida' ga zoali' leyúbl cati' uzá'a ni quië uzi'li' xba' chop lzu. Töd ni' huac gáclenli' neda' ugu'li' neda' nöz tsija' luyú Judea. Cni gu'nda' guna'. <sup>17</sup>¿Naru' ráquitsali' gzxi' yë'a le butsó'a ca guna'? ¿Naru' ráquitsali' lu yöl-la' bunáchz quia' runa' le rdxinx icja', len bë'za' ca' didza' cati' gnia': Cni guna'? <sup>18</sup>Ni'a queë' Xanru' Dios, Nu run gdu'të ca rna xtídzë'ë, cutu bë'za' ca' didza' cati' bé'lëna' lbi'ili' xtídzë'ë Dios. <sup>19</sup>Jesucristo, Zxi'në' Dios, Nu na' bentu' lban qui ga zoali', neda' len Silvano len Timoteo, cutu rui'zë' ca' didza'. Lë' ru'ë didza' gdu'të li. <sup>20</sup>Cristocz runë' ga nac gdu'të löz yúgu'të le gzxi' lu në'ë Dios, ati' ni'a queë' Lë' gac gnaru': "Ca' gac", quië gac queë' Dios yöl-la' ba. <sup>21</sup>Dioscz runë' ga runtu' löz tsazxón len lbi'ili' náquiru' queë' Cristo, len budödë' lu na'tu' dxin queë' runtu'. <sup>22</sup>Bennë'

queëru' le nac bë' náquiru' queë', bchizië' icj ládxi'dau'ru' Dios Bò' La'y, Nu nac queëru' le run ga nac löz yúgu'të le gunné' queëru' Dios.

<sup>23</sup>Ni'a queë' Xanru' Dios, Nu nözi le rza' ladx'a'a, ru'a didza' gdu'të li. Nözcznë' Lë' cutu bida' ga zoali' lu yödzc Corinto, cui gun bayúdx guna' ga huí'nili'. <sup>24</sup>Cutu ré'nitu' gna bé'itu' lbi'ili' ca réjlë'li' Cristo, le chnacli' tsutsu ca réjlë'li' Lë'. Ré'nitu' guntu' le gun ga udziji ládxi'li'.

**2** Qui lë ni na' bë' ladx'a'a cu guidea' queëli' leyúbl, cui guna' ga huí'nili'. <sup>2</sup>Chqui' guna' neda' ga huí'nili', ¿nuzxa caz gun ga udzijda' neda'? ¿Naru' guntsa' ga hui'ni nu ral-la' gun ga udzijda' neda'? <sup>3</sup>Qui lë ni na' buzuja' queëli' lu guich zi'al. Cutu gu'nda' guida' ga zoali', cui gunli' ga hui'nda', le ral-la' gunli' lbi'iczi'li' ga udzijda' neda'. Le ruzxöni ladx'a'a lbi'ili', nözda' udzjili' yúgu'tëli' chqui' udzijda' neda'. <sup>4</sup>Cati' ni' buzuja' queëli' lu guich lë na', gsébitsqui ladx'a'a, len buí'nitsqui ladx'a'a ga bdxintë grödx'a'. Buzuja' cni lu guich, clëg quië guna' ga huí'nili' san quië gnözili' ca nadxí'itsquida' lbi'ili'.

**Ral-la' unít lauru' nu rua' dö'**

<sup>5</sup>Chqui' zoë' ni' bönni' na' bushui'nnë' rë'u, clëg neda'z bushui'nnë', san yúgu'tëli' lbi'ili' bushui'nnë' lati'. Rnia': Lati', cui töd bë'i gchugu bë'a queë' bönni' na'. <sup>6</sup>Tscati' gaz zxguia' chbenli' queë' bönni' na' yelati'z cunuhoátëli'. <sup>7</sup>Na'a, ral-la' unít lauli' bönni' na' len utipli' ladxë'ë, cui töd bë'i

hui'nnè' len cui gac tsaz chop ladxè'è. <sup>8</sup>Qui læ ni na' ráta'yua' lauli' gunli' le gac bè' nadxi'ili'-nè' gdu ládxi'li'. <sup>9</sup>Qui læ ni na' ca' buzuja' queèli' lu guich læ na'. Gu'nda' si' bè'a lbi'ili' quiè gnözda' chqui' rúnteczli' ca rna xtidza'a. <sup>10</sup>Cati' nu runít lauli' lbi'ili', neda' ca' runít lahua' nu na'. Cati' nu runít lahua', chqui' bi ben nu na' runít lahua', runa' cni uláz queè' Cristo quiè gac bi uzi'li' xbey. <sup>11</sup>Cni runa', cui saqui' Satanás tu' xöhui' uxícj rè'u, le chnóziru' yugu' le rè'ni gun queèru'.

#### Grö'è bagu'i Pablo lu yödZ Troas

<sup>12</sup>Cati' bdxina' lu yödZ Troas quiè guna' lban qui didza' dxi'a queè' Cristo, benntsquè' neda' latj Xanru' guna' lban ni'. <sup>13</sup>Zal-la' guc cni, grö'a bagu'i' le cutu yajxaca'a-bi' ni' bi'i böchi'ru' Tito. Qui læ ni na' buzá'lena' bunách ni', gyija' luyú Macedonia.

#### Gdél-li'ru' le zóalenè' rè'u Cristo

<sup>14</sup>Xclenè' Dios, rché'teczè' rè'u ca tu le nac bè' bdél-li'nè' Cristo yöl-la' ruslá queèru'. Dios rugunè' dxin rè'u quiè rulu'è lahui ca gac lunbè' Cristo bunách. Le nacru' nac ca tu le rla' zxix, le rguis gáti'tèz. <sup>15</sup>Nacru' ca tu nör rla' zxix, le ruzégui'è Cristo lahuè' Dios, len le rguisiè' laugac nup nulagac len nup nanitgac. <sup>16</sup>Laugac nup na' nanitgac nacru' ca tu le rla' zgut le nac bè' latiè', san laugac nup na' nulagac nacru' ca tu le rla' zxix le nac bè' gbánteczru'. ¿Nuzxa caz nac lsaca' gun cni? <sup>17</sup>Cutu runtu' ca tun zian bunách tu'gún dxin xtidzè'è Dios

ca tu le tuti' len ta'u bunách, san le nasölè'è netu' Dios, gdu ládxi'tu' rui'tu' didza' lahuè' Lè' le nactu' tuz len Cristo.

#### Ca nac didza' ruún rè'u tuz len Dios

**3** ¿Naru' ráquitsali' run ba zxön cuintu' cati' rui'tu' cni didza'? ¿Naru' runtsa bayúdx ului'tu' lbi'ili' guich le ruluí' le nactu'? ¿Naru' ral-la' gnábitu' lbi'ili' gunnli' queètu' tu guich cni, ca na' tun la'gac bunách? <sup>2</sup>Lbi'iczli' nacli' ca tu guich le ruluí' le nactu', le nayúj lu icj ládxi'dau'tu', ati' yúgu'tè bunách gac luláb lei len luúnbè' lei. <sup>3</sup>Le nacli' nalá' lahui ca tu guich nuzujè' Cristo, le bsölè'è lu na'tu'. Cutu nayúj tu lu guich, san Bö' La'y queè' Dios ban nuzujè' lei, clèg tu lu guiöj blag, san lu icj ládxi'dau'li' nuzujè'.

<sup>4</sup>Rui'tu' cni didza' le ruzxöni ládxi'tu'-nè' Dios le zóalenè' netu' Cristo. <sup>5</sup>Cutu ráquitu' bi gac guntu' racz queètu', san Dios runnè' queètu' yöl-la' huac bi guntu'. <sup>6</sup>Dioscz bennè' queètu' yöl-la' huac guntu' xchinè' lu didza' cub na' ruún rè'u tuz len Dios. Didza' ni cutu nac tu zxba nayúj lu guich, san nac tu le rusèdnè' rè'u Dios Bö' La'y. Zxba na' nayúj lu guichz rchugu queèru' gatrú', san Dios Bö' La'y nabániru'.

<sup>7</sup>Yugu' zxba queè' nayujgac lu guich, Dios buzujè' yugu' lu guiöj blag, ati' bulu'è lahui yöl-la' yení' queè' cati' budödè' lei lu nè'è Moisés. Zal-la' gdöd qui, gyèptèr yös yení' lahuè' Moisés. Cni guc, cutu guc luyú lahuè' Moisés bunách Israel. Chqui' yajtság zxba na' yöl-la' yení' cni, ati' zxba na' rchugu

quegac bunách lat, <sup>8</sup>sxzónitèr ca' ral-la' gac yöl-la' yení' dzag yugu' le runè' Dios Bö' La'y. <sup>9</sup>Gzoa tu yöl-la' yení' yaítság lè na' ben ga narugu quegac bunách lat. Sxzónitèr nac yöl-la' yení' qui lè na' run ga rnè' Dios nacgac tsahui' bunách. <sup>10</sup>Le nactèr lsaca' yöl-la' yení' nalá' lahui na'a, cuidí'z nagá'n yöl-la' yení' na' bla' lahui cati' Dios bunödzejè' quegac bunách zxba queè'. <sup>11</sup>Chqui' gzoa yöl-la' yení' qui lè na' gzoa tu chí'ldau'z, zxöntèr nac yöl-la' yení' qui lè ni soa tsalzú.

<sup>12</sup>Le zoa queèru' lè ni runru' löz, rui'tu' didza' lu yöl-la' rugu ladxí' queètu'. <sup>13</sup>Cutu runtu' ca benè' Moisés, bucachi' lahuè' len tu lári'dau', cui luyú bunách Israel yöl-la' yení' na' zeaj rnit. <sup>14</sup>Gulachúl gulanitiè' bönni' ni'. Ga rdxintè na'a dza cati' tu'labè' guich qui didza' gul na' ruún bunách tuz len Dios, nac quequè' tsa nagá'n la' leyz lári'dau' na' lauquè', lè na' gac ugüè' tuzè' Cristo. <sup>15</sup>Ga rdxintè na'a dza, cati' tu'labè' guich ga na' nayúj didza' queè' Moisés, zxoac tu lári'dau' yøj lauquè' le run ga nachúl nanitquè'. <sup>16</sup>Cati' nu ruhuóac queè' Xanru', rdua lè na' run ga nachúl nanít nu na'. <sup>17</sup>Cati' ni rnatu': "Xanru'", rui'tu' didza' queè' Dios Bö' La'y. Ga zoè' Bö' La'y queè' Xanru', ni' zoacz yöl-la' nadzán. <sup>18</sup>Yúgu'tèru' rè'u cutu bi nuséy lauru', san nacrú' ca tu guía dxili ga nalá' yöl-la' yení' qui lahuè' Xanru', ati' yöl-la' yení' na' queè' Xanru', Nu nac Bö' La'y, rutsá' rè'u, len run ga zeaj racr-ru' ca naquè' Cristocz, len rata'r queèru' yöl-la' yení' queè'.

**4** Dios buechi' ladxè'è netu' len budödè' lu na'tu' dxin ni runtu', len qui lè ni na' cutu rac chop ladxí'tu'. <sup>2</sup>Chbuca'ntu' yugu' le tun bagachi'z bunách len le tun ga rutui'ru'. Nutu nu rzi' yé'itu', len cutu rutsa'tu' xtidzè'è Dios. Le rui'tu' didza' qui le nac gdutè li, rui' ladxí'tu' guntu' le láquibe'i yúgu'tè bunách nac dxi'a lahuè' Dios. <sup>3</sup>Chqui' zoa nu curejni'i didza' dxi'a runtu' lna' lau qui, nacgacz nup nachúl nanitgac cutu ta'yejni'i lei. <sup>4</sup>Cutu ta'yejlè' bunách na', le ben ga nac cni tu' xöhui', nu nun cuini ca dios, len rna be'i bunách dza ni zoaru' na'a, le ben ga nachúl nanitgac, cui la'le'i yení' qui didza' dxi'a ca nac yöl-la' yení' queè' Cristo, Nu na' rna' gdu ca naquè' Dioscz. <sup>5</sup>Cutu runtu' lban qui la' cuinztu', san runtu' lban queè' Jesucristo, rguíxjö'tu' naquè' Xanru', ati' netu' ni nactu' huen dxin queèli' le nadxi'itu'-nè' Jesús. <sup>6</sup>Dios, Nu ben ga buzení' yení' ga ni' guc chul, naquè' Nu rgu'u yení' icj ladxí'dau'ru', le ruzejni'i rè'u quiè gúnbè'ru' yöl-la' yení' queè' Dios, lè na' ruzení' lahuè' Jesucristo.

**Le réjlè'ru' Dios runru' ca rè'nnè' Lè'**

<sup>7</sup>Yöl-la' tsahui' ni yu'u icj ladxí'dau'ru' rè'u, nacrú' ca yusu' náquicni yu, quiè gac bè' naqui queè' Dios yöl-la' huac zxon na' len clèg queèzru'.

<sup>8</sup>Tu'saca' zi' netu' bunách san cutu rudú ladxí'tu'.

Rò'tu' baguf'i san cutu rac chop ladxí'tu'.

<sup>9</sup>Ta'bía ladxí' netu' bunách san cutu rubíj ladxè'è netu' Dios.

Ta'zé'itsqui netu' yu, san cutu  
tu'snít lau netu'.

<sup>10</sup>Lu gdu ca nayá' nabintu' ráttectztu'  
tsazxón len Jesús, san rac bē' lu  
gdu ca nayá' nabintu' nabánitu' Lē'.

<sup>11</sup>Tsal ni zoatu' nabantu', zoatecz  
banádx gattu' le náquitu' queē'  
Jesús quiē gac bē' nabánitu' Lē' lu  
gdu ca nayá' nabintu' le rnit. <sup>12</sup>Cni  
nac, zoa banádx queētū' gattu', san  
ni'a qui lē ni rata' queēli' yōl-la'  
na'bán.

<sup>13</sup>Nayúj lu guich la'y, rna:

“Gyéjlē'a Dios, ati' qui lē ni na' bē'a  
didza.” Lēzca' cni rac queētū',  
réjlē'tu' Dios, len qui lē ni na' rui'tu'  
didza'. <sup>14</sup>Nózitū' ca gunē' Dios, Nu  
buspán Xanru' Jesús, uspanē' ca'  
netu' tsazxón len Jesús len uschinē'  
netu' tsazxón len lbi'ili' lahuē' Lē'.

<sup>15</sup>Rac cni yúgu'tē lē ni quiē gac bi  
uzi'li' xbey, ati' chqui' la'del-li' zianr  
ca' bunách le ruzá' ladxē' queēru'  
Dios, la'né': “Xclenē' Dios”, ati' gac  
queē' Dios yōl-la' ba.

<sup>16</sup>Qui lē ni na', cutu rac chop  
ládxi'tu'. Zal-la' rnit gdu ca nayá'  
nabintu', yúgu'tē dza rucubē'  
Dios le nactu' lu icj ládxi'dau'tu'.

<sup>17</sup>Le cuidi'z rzaca' rgui'ru' ni tu  
chi'idau'z run ga gata' queēru' le  
uzi'tscaru' xbey le soa tsalzú len  
le nactēr lsaca' ca gac gúnbē'ru'.

<sup>18</sup>Cutu rui' ládxi'ru' le rlé'iru' luyú  
ni, san le curlé'iru' rui' ládxi'ru'. Lē  
na' rlé'iru', tu chi'idau'z zoa, san le  
curlé'iru' soa tsalzú.

**5** Nóziru' cati' nit gdu ca nayá'  
nabinru', le nac ca tu yu'u  
lári'dau' yödzylyú ni, Dios chnupé'ē  
queēru' tu le cub, le nac ca tu  
yu'u zoa tsaz ni' yehua' yubá, lē  
na' nunczē' Lē'. <sup>2</sup>Qui lē ni na' rnē

ládxi'ru' le ré'niru' tsazru' le cub  
ni', lē na' nac ca tu lidxru' ni'  
yehua' yubá. <sup>3</sup>Tsazru' le cub ni' ca  
na' rácuru' tu lari', cui soaru' ga  
cuzóa gdu ca nayá' nabinru'. <sup>4</sup>Tsal  
ni zoaru' lu gdu ca nayá' nabinru',  
le nac ca tu yu'u lári'dau', rnē  
ládxi'ru' lu yōl-la' rsēbi ladx'  
queēru'. Cutu runru' cni le ré'niru'  
uca'nru' gdu ca nayá' nabinru',  
san ré'niru' tsazru' tsaz le cub  
ni'. Cni gac, uca'nru' gdu ca nayá'  
nabinru' le rnit, ati' tsazru' lu yōl-la'  
na'bán gdu. <sup>5</sup>Dios chnupé'ē queēru'  
yúgu'tē lē ni, ati' bchiziē' rē'u Dios  
Bō' La'y, Nu nac queēru' le nac bē'  
nac lōz si'ru' lē na' nupé'ē queēru'.

<sup>6</sup>Qui lē ni na' nadíp ládxi'ru'.  
Tsal ni yu'uru' lu gdu ca nayá'  
nabinru', nóziru' zoaru' zi'tu' ga zoa  
lidxē' Xanru'. <sup>7</sup>Runru' ca runru' le  
réjlē'ru'-nē' Dios, len clēg le zoa bi  
rlé'iru'. <sup>8</sup>Le runru' lōz lē ni, ré'niru'  
uca'nru' gdu ca nayá' nabinru'  
ni quiē tsajsóalenru'-nē' Xanru'.  
<sup>9</sup>Qui lē ni na' rui' ládxi'ru' gunru'  
le rdzag ladxē'ē Xanru', chqui'  
uga'nru' lu gdu ca nayá' nabinru'  
ni, o chqui' tsajsóalenru'-nē' Xanru'  
ni'. <sup>10</sup>Cni runru' le run bayúdx  
gdxinru' yúgu'tēru' lahuē' Cristo ga  
ni' rō'ē rbequi xbeynē'. Ni'r ubi'ē  
qui queēru' tsca nac le benru' tsal  
ni yu'uru' lu gdu ca nayá' nabinru',  
chqui' benru' le nac dxi'a o le cunác  
dxi'a.

#### Le ruún rē'u tuz len Dios

<sup>11</sup>Qui lē ni na', le rádxitu'-nē'  
Dios, rui' ládxi'tu' uzéjni'tu' bunách.  
Nözcznē' Dios ca nac le yu'u icj  
ládxi'dau'tu', ati' ruzxōni ladxa'a  
nózili' dxi'a ca' lbi'ili' lē na' yu'u

icj ládxi'dau'tu'. <sup>12</sup>Cutu rubíj cuintu' dxi'a lauli', san ré'nitu' gata' queëli' latj gunli' netu' ba la'n, quië gac ubi'ili' didza', bi guiëli' bönni' tun ba zxön cuinquë' ca na' tu'luí'z lahui cuinquë' len clëg ca nacquë' lu icj ládxi'dau'quë'. <sup>13</sup>Chqui' nachixi icjtu', nac quië gac yöl-la' ba queë' Dios, len chqui' cutu nachixi icjtu', nac quië gac bi uzi'li' xbey. <sup>14</sup>Run bayúdx bi guntu' le nadxi'inë' rë'u Cristo, le nóziru' tuz Nu gut uláz quegac yúgu'të bunách, len qui lë ni na' nac quegac yúgu'të bunách tsca nátlengac Lë' tsaxón. <sup>15</sup>Lë' gutië' uláz quegac yúgu'të bunách quië cutur bi lunë' bönni' nabanquë' le naqui quégaczë', san le naqui qui Nu na' gut uláz quequë' len bubán lu yöl-la' gut. <sup>16</sup>Qui lë ni na', cutur gúnbë'tu' bunách tsca nac le tu'luí'z lahui, len zal-la' cniz bénbë'tu'-në' Cristo, cutu núnbë'tu'-në' cni na'a. <sup>17</sup>Chqui' nuhuóac tuz len Cristo nútí'tëz bunách, chnac bunách cub nu na'. Chgdöd qui le glac zial, ati' chnucubgac yúgu'të.

<sup>18</sup>Yúgu'të lë ni nunë' Dios, Nu bun rë'u tuz len Lë' lu në'ë Cristo, ati' budödë' lu na'tu' guntu' lban ca gac luhuóac tuz len Lë' yúgu'të bunách. <sup>19</sup>Lban runtu' rna cni: "Dios gzóalenë' Cristo, benë' ga gac luhuóac tuz len Lë' bunách yódzlyú ni, len cutu rajneynë' dul-la' gulabaga'." Budödë' lu na'tu' didza' dxi'a ni, ca gac luhuóac tuz len Dios bunách. <sup>20</sup>Na'a, nactu' gbaz queë' Cristo, len rac na'a ca Diosz ráta'yue' lauli' lu rú'atu' netu'. Qui lë ni na' ráta'yutu' lauli' uláz queë' Cristo, gul-huóac tuz len Dios.

<sup>21</sup>Cristo cutu bi dul-la' benë', san Dios budödë' Lë' ca bönni' dul-la' uláz queëru' quië gata' latj queëru' gacru' tsahui' ca naquë' Diosz le nacru' tuz len Cristo.

**6** Le runtu' dxin tsaxón len Dios, ráta'yutu' lauli', rnatu': Cutu udödlí' ca'z le ruzá' ladxë'ë queëli' Dios. <sup>2</sup>Nayúj lu guich la'y ca gnë' Dios, rna:

Tu dza buzá' ladxa'a quiu',  
byönda' li'

Ati' dza bena' ga gac uláu',  
gúclena' li'.

Gul-yutsca'. Na'a nac dza ruzá' ladxë'ë queëru'. Na'a nac dza gac ularu'.

<sup>3</sup>Cutu ré'nitu' bi guntu' le gun ga nu gchixi gnigui, cui soa nu ucá'n ca'z dxin ni runtu'. <sup>4</sup>Ni'a qui bíti'tëz bi runtu', rui' ládxi'tu' gac bë' nactu' huen dxin queë' Dios. Qui lë ni na', len yöl-la' rböz zxön ladxí' rua' rlentú' yugu' le rzaca' rguí'tu', len yugu' le ryadzj queëtu' len le tun ga rö'tu' baguí'i. <sup>5</sup>Cni bentu' zal-la' gulazé'itsqui netu' yu bunách len gulagu'ë netu' lidx guía, len gulabía nidië' netu'. Gdöd bë'i bentu' dxin, cutu guta' queëtu' latj gastu' o bi gágutu'. <sup>6</sup>Bë' ládxi'tu' gac bë' nactu' huen dxin queë' Dios. Guc bë' lë ni

Le nactu' ba'a ladxí',

Len le naptu' yöl-la' rejni'i,

Len le rböztu' zxön ladxí',

Len le nactu' dxi'i ladxí',

Len le zóalenë' netu' Dios Bö'

La'y,

Len le nac gdu ca nadxi'itu' lza'tu'.

<sup>7</sup>Rui'tu' didza' gdu'të li ati' zoalen netu' yöl-la' huac queë' Dios. Le nac tsahui' nac ca tu le rneytu' lu gdil-l, lenca' le run chi'i netu' lu gdil-l na'.

<sup>8</sup> Nacuá' nup tun netu' ba la'n,  
 Lenca' nup tu'zóa netu' tsla'l.  
 Nacuá' nup tu'lídz ditj netu',  
 Lenca' nup tu'lídz tsahui' netu'.  
 Zal-la' ta'ná bunách rzi' yè'tu',  
 Rui'tu' didza' gdutè li.  
<sup>9</sup> Zal-la' nacuá' bunách  
 cunúnbè'gac netu',  
 Nacuá' ca' nup núnbè'gac netu'.  
 Rdatu' ga zoa banádx gattu',  
 San ni zoatu' nabantu'.  
 Tunè' netu' zxguia',  
 San cutu tu'dóddè' netu'.  
<sup>10</sup> Tu'shui'ni netu',  
 San rudzjíitecztu'.  
 Nactu' bönni' yechi',  
 San runtu' ga rata' quegac  
 bunách zian yöl-la' tsahui' gdu.  
 Zal-la' cutu bi dè queètu',  
 Naqui queètu' yúgu'tè le dè.  
<sup>11</sup> Gdu ládxi'tu' ruí'lentu' lbi'ili'  
 didza', böchi' lza'adau', zoali'  
 Corinto. Bului'itu' lbi'ili' gdu ca rui'  
 ládxi'tu' lbi'ili'. <sup>12</sup> Chqui' cutu nacru'  
 tuz cutu nac le curuí' ládxi'tu' lbi'ili',  
 san lbi'iczi' cutu rui' ládxi'li' netu'.  
<sup>13</sup> Na'a, ruí'lena' lbi'ili' didza' ca runè'  
 bönni' ruí'lenè'-bi' didza' zxi'nè',  
 rnia': Gul-bí'i queètu' ca rúnentu'  
 lbi'ili'. Gul-güi' ladxi' netu'.

**Nacru' ca tu gdau' ga yu'ë Dios ban**

<sup>14</sup> Cutu gacli' tuz len bunách  
 cuta'yejlè'.  
 ¿Nacxcz gac lac tuz le nac  
 tsahui' len le cunác tsahui'?  
 ¿Nacxcz gac lac tuz le nac chul  
 len le nac yení'?  
<sup>15</sup> ¿Nacxcz gac lacquè' tuz Cristo  
 len Satanás, tu' xöhui'?  
 ¿Nacxcz gac lacquè' tuz bönni'  
 rejle'è Cristo len bönni'  
 curejle'è?

<sup>16</sup> ¿Nacxcz gac lac tuz gdau' queè'  
 Dios len bdau' guiöj bdau'  
 yag?  
 Lbi'iczi' nacli' ca tu gdau' ga yu'ë  
 Dios ban. Ca nac lè ni, Dioscz gnè':  
 Sóalena' lequè' len tálena' lequè'.  
 Gaca' Dios quequè',  
 Ati' lequè' lacquè' bunách quia'.  
<sup>17</sup> Qui lè ni na', gnè' ca' cni:  
 Gul-rúj ladjquè', len gul-la'alen  
 lequè'.  
 Rnè' Xanru': "Cutu gútsa'li' le  
 cunác,  
 Ati' si' lu na'a lbi'ili'.  
<sup>18</sup> Neda' gaca' xuzczli',  
 Ati' lbi'ili' gacli' zxi'na', bönni'  
 len ngul."  
 Cni rnè' Xanru', napczè' gdutè  
 yöl-la' huac.

**7** Yugu' lè ni gzxi' lu në'ë Dios  
 náquigac queèru', böchi'  
 lza'adau'. Qui lè ni na' ral-la' un  
 cuinru' dxi'a, ubiajru' yúgu'tè le  
 rucá'n ca'z gdu ca nayá' nabinru' len  
 bö' nacczru'. Lu yöl-la' radxi queèru'  
 Dios ral-la' gáquiru' quizi queè' Lè'.

**Ca gulubí'i ládxi'gac  
 nup ta'yejlè' Cristo**

<sup>2</sup> Gul-sí' lu na'li' netu'. Nutu nu  
 bia'tu' dō' qui, nu dzag lbi'ili'. Nutu  
 nu bentu' ga gchixi gnigui. Nutu  
 nu gzxi' yé'itu'. <sup>3</sup> Ru'a cni didza',  
 clèg quiè uspaga'a lbi'ili' zxguia',  
 san nac ca na' chgnia' zi'al, rnia':  
 Zoa' sina' gbánlena' lbi'ili' o  
 gátlena' lbi'ili' le rui' ladxa'a lbi'ili'.  
<sup>4</sup> Ruzxónitsca ladxa'a lbi'ili' len  
 runtsca' lbi'ili' zxön. Zal-la' zian le  
 rzaca' rgui'tu', nadiptsca ladxa'a len  
 rudzjíitsqui ladxa'a.  
<sup>5</sup> Cati' bdxintu' luyú Macedonia,  
 ga rdxintè na'a dza, cutu rata'

queëtu' latj uzí' ládxi'tu', san le zian le rac queëtu'. Ta'dil-len netu' bunách, ati' lu icj ládxi'dau'tu' yu'ugac le tun ga rádxitu'. <sup>6</sup>Ni'r Dios, Nu rutíp ladxí' nu chzoa gac chop ladxí', butipë' ládxi'tu' cati' budxinbi' queëtu' bi'i Tito. <sup>7</sup>Cutu gucz le budxinbi' queëtu', san le gdíxjöi'bi' ca' netu' ca na' butipli' ládxi'bi' lbi'ili'. Gdíxjöi'bi' netu' ca na' ré'nitsquili' ulé'ili' neda', len ca na' ruhuí'nili' ni'a qui lë na' guc ni', lenca' ca rui' ládxi'li' neda'. Yúgu'të lë ni ben ga rudziji ladx'a'a.

<sup>8</sup>Zal-la' ben ga buí'nili' le buzuja' queëli' lu guich zi'al, cutu ruhui'nda' na'a. Zi'al bui'nda' cati' gúquibe'ida' ben ga buí'nili' lbi'ili' tu chi'idau', <sup>9</sup>san na'a rudzijda', clëg le buí'nili', san le ben ga bubí'i ládxi'li' yöl-la' ruhui'ni queëli' na'. Dios bugunë' dxin yöl-la' ruhui'ni queëli', cui gchixi gníguili' ni'a qui le bentu' netu'. <sup>10</sup>Yöl-la' ruhui'ni na' rugunë' dxin Dios run ga nu ubí'i ladxí' quië ulá nu na', ati' qui lë ni na' cutu ral-la' huí'niru' qui, san yöl-la' ruhui'ni le nac qui yödzyú ni run ga lat bunách. <sup>11</sup>Gul-yutsca' ca bugunë' dxin Dios yöl-la' ruhui'ni queëli' na'.

Ben ga rui' ládxi'li'-në' Dios.  
 Ben ga gú'nili' urujli' dxí'a.  
 Ben ga gleyli' nu na' ben dul-la'.  
 Ben ga rádxi'li'-në' Dios.  
 Ben ga bë' ládxi'li' gunli' ca rna xtidzë'ë Dios.  
 Ben ga nadxi'ili'-në' Dios gdu ládxi'li'.  
 Ben ga gú'nili' gunli' xzguia' nu na' ben dul-la'.  
 Benli' le nac bë' cutu bi dul-la' nabága'li' ni'a qui lë na' guc.

<sup>12</sup>Qui lë ni na', zal-la' buzuja' cni lu guich na', cutu guc ni'a qui nu na' ben dul-la', len clëg ni'a qui nu na' gzxaca' gdi'i, san quië gac bë' lahuë' Dios le nactë rui' ládxi'li' netu'.

<sup>13</sup>Lë ni butíp ládxi'tu'. Clëgz bdiip ládxi'tu' san rudzjitsqui ládxi'tu' le rudzjibi' bi'i Tito ni'a qui le benli' lbi'ili', butipli' ládxi'bi'.

<sup>14</sup>Bena' lbi'ili' zxön laubi' Tito, ati' cutu benli' ga utui'da'. Bë'lentecztu' lbi'ili' didza' gdutë li, ati' lëzca' cni nac gdutë li didza' bë'lentu'-bi' Tito cati' bentu' lbi'ili' ba la'n. <sup>15</sup>Zeaj racr gdu ca nadxi'ibi' lbi'ili' bi'i Tito cati' rajneybi' ca na' benli' ca rna xtídza'tu', len ca na' benli'-bi' ba la'n lu yöl-la' radxi Dios queëli' len lu yöl-la' nöxj ladxí' queëli'.

<sup>16</sup>Rudzjitsquida' le gac uzxöni ladx'a'a lbi'ili' gdu ladx'a'a.

### Ca ral-la' unódzj le dë qui, nu rejle' Cristo

**8** Na'a, böchi' lza'adau', ré'nitu' quíxjöi'tu' lbi'ili' ca nac le buzá' ladxë'ë Dios quegac yugu' cö' bunách queë' Cristo luyú Macedonia. <sup>2</sup>Zal-la' sxzöni gulazaca' gulagui'ë lu yugu' le gzxí' bë' lequë', sxzónitër guludzijnë' len gdu ládxi'quë' gulunödzjë' sxzöni zal-la' nacquë' bunách yechi'. <sup>3</sup>Neda' runa' lna' lau quequë', gdu ládxi'quë' gulunödzjë' yúgu'të tsa gulazáqui'në', len gulunödzjrë' tsa gulazáqui'në'. <sup>4</sup>Bayúdx gulanabnë' netu' len sxzöni gláta'yue' lautu' güi'tu' lequë' latj tsaxón len netu' lácnenë' bóchi'ru' ta'yejlë'ë Cristo. <sup>5</sup>Glunrë' ca guqui icjtu' lunë', le guludód cuinquë' zi'al lu në'ë Xanru' lenca' lu na'tu' netu', le nac



le rdzag ladxë'è Dios. <sup>6</sup>Qui lè ni na' gnábitu'-bi' bi'i Tito udx gunbi' xchinbi' ga ni' zoali', utubbi' dumí runödzejli' lu yöl-la' dxi'i ladxí' queëli', ca na' gzu laubi' benbi' zi'al. <sup>7</sup>Nacli' blau ca nac yúgu'tè le runli', ca réjle'li' Cristo, len ca réjni'li', len ca ruzéjni'li' bunách, len ca rui' ladxí'li' lza'li', lenca' ca nadxi'ili' netu'. Lëzca' cni ral-la' gacli' blau ca gáclenli' lza'li', lu yöl-la' dxi'i ladxí' queëli' bi unödzejli' quequë'.

<sup>8</sup>Cutu rna bé'ida' lbi'ili' gunli' cni. Ru'a didza' ca tun yela'gac bunách, tu'nódzj gdu ladxí'gac, quië guna' ga gunli' le gac bë' nac gdu ca nadxi'ili' lza'li'. <sup>9</sup>Nóziczli' le buzá' ladxë'è queëru' Xanru' Jesucristo. Blé'inë' yöl-la' tsahui' san quië gáclenë' lbi'ili' böaquë' yechi' quië gata' queëli' yöl-la' tsahui', le guquë' Lë' yechi'.

<sup>10</sup>Cni runi neda: Dxi'ar gac queëli' udx gunli' lè na' gzu lauli' runli' chguc tu iz. Gucli' blau, clëgz ca bunödzejli', san lëzca' ca gú'nili' unödzejli'. <sup>11</sup>Na'a, gdu ladxí'li' gul-syúdx gunli' lè na' gzu lauli' runli', gdu ladxí'li' bunödzejli'. Gul-nódzj na'a tsca sáqui'li'.

<sup>12</sup>Chqui' ré'nili' bi unödzejli', Dios runë' ba la'n le runödzejli' tsca nac le dëz queëli'. Cutu rna'bë' unödzejli' tsca le dëz queëli'.

<sup>13</sup>Cutu rë'nda' guna' ga unödzejli' le gaclen yezica' bunách ga gdxintë yadzj queëli'. <sup>14</sup>Rë'nda' gac tuz ca dë queëli', len quequë'. Na'a szxöni dë queëli' le gac unödzejli' quië bi gata' quegac nup ni' ryadzj quequë'. Ni'r cati' bi yadzj queëli', lequë' huac bi lunödzej' queëli' quië cni gac tuz ca dë queëli' len quequë'

yúgu'tëli'. <sup>15</sup>Lëzca' cni nayúj lu guich la'y, rna: "Nu na' butúb szxöni, cutu bugá'n qui, ati' nu na' butúb lati'z, cutu byadzj qui."

### Ca runbi' Tito lenca' nup dzaggac lëbi'

<sup>16</sup>Xclenë' Dios, Lë' benë' ga rui' ladxí'bi' lbi'ili' bi'i Tito ca na' rui' ladxa'a lbi'ili' neda'. <sup>17</sup>Clëgz runbi' ca rna xtidza'a bi gnabda'-bi', san le rui' ladxí'czbi' lbi'ili', racz queëbi' gú'nibi' tsajyubi' lbi'ili'.

<sup>18</sup>Rsóla'tu'-në' tsaxxón len lëbi' bóchi'ru' na' tun lë' ba la'n yúgu'të cö' bunách queë' Cristo, le runë' dxi'a dxin qui didza' dxi'a. <sup>19</sup>Yetú ca', gulabó bönni' ni yugu' cö' bunách queë' Cristo quië tséajlenë' tsaxxón netu' gua'tu' lè na' runödzejli' quië gac yöl-la' ba queë' Xanru', len gac bë' ca' rui' ladxí'ru' lza'ru' ta'yëjle'è Cristo. <sup>20</sup>Cni gac, gunë' netu' tsaxxón quië nutu nu bi gac gnë queëtu' ca rúnlentu' dumí na' runödzejli' szxöni, le gaclen bunách yechi'. <sup>21</sup>Rui' ladxí'tu' guntu' le nac dxi'a, clëgz lahuë' Xanru', san lëzca' laugac bunách.

<sup>22</sup>Rsóla'tu'-në' ca' tsaxxón len lequë' yetüë' bóchi'ru', zian lzu gzxí' bë'tu' lë', ati' nac bë' rë'nnë' gáclenë' rë'u gdu ladxë'è. Yetú ca', le ruzxöni ladxë'è lbi'ili', ré'ntërnë' ca' gáclenë' rë'u lu dxin ni. <sup>23</sup>Chqui' nu bi gnab ca nacbi' bi'i Tito, nacbi' lza'a, rúnlenbi' neda' tsaxxón dxin quië gáclentu' lbi'ili'. Chqui' nu bi gnab ca nacquë' yezíca'rë' bóchi'ru' na', nasóla'gac lequë' yugu' cö' bunách queë' Cristo, ati' tunë' ga gac queë' Cristo yöl-la' ba. <sup>24</sup>Gul-gún ga gac bë' nadxi'ili'

lequë' quië láquibe'i runli' cni yugu' cõ' bunách queë' Cristo, len la'nõzi nac gdutë li didza' dxi'a rui'tu' ca nac queëli'.

**Ca nac dumí rutubru' le  
gaclen bóchi'ru'**

**9** Ca nac le runödztli' quequë' bóchi'ru' ta'yejlë'ë Cristo, cutu run bayúdx uzuja' queëli' lu guich ni. <sup>2</sup>Chnözda' ca ré'nili' gunli' lë ni, ati' ru'a didza' laugac bunách ta'yejlë' Cristo luyú Macedonia ni ca nac le dxi'a runli'. Rguíxjöi'da' lequë' ca nac queëli', zoali' luyú Acaya, chguc tu iz chzoa gunli' lë ni, ati' le rui' ládxi'li' gunli' lë ni, bdip ládxi'gac yelati'z cuguluhoatë bunách ni ta'yejlë' Cristo. <sup>3</sup>Na'a, rsöla'a queëli' yugu' bóchi'ru' ni quië gac bë' nac gdutë li didza' rui'tu' ca nac queëli', ati' nac ca na' chgnia' queëli', chzoa gunli' lë na' gaclen lza'ru'. <sup>4</sup>Chqui' la'za'clen tsazxón neda' la'gac bunách Macedonia ta'yejlë' Cristo, ati' gac bë' cutu zuini gunli' lë na', ni'r utui'tu' le buzxöni ládxi'tu' lbi'ili', ati' lbi'iczi' ca' ral-la' utui'li'. <sup>5</sup>Qui lë ni na' gúquida' ral-la' gsöla'a yugu' bóchi'ru' ni la'dxín ga zoali' zi'al ca neda', ati' laclen lbi'ili' quië udx utubli' lë na' gzxi' lu na'li' unödztli'. Cni gac, udx utubli' dumí na' zi'al ca gdxina', ati' gac bë' runödztli' le ré'niczi' len clëg le rqui'itu' lbi'ili' bi unödztli'.

<sup>6</sup>Gul-tsajnéy lë na' rna:

Nu raz ruzóa lati'z, lati'z ca' uzí'.

Nu raz ruzóa szxöni, szxöni ca' uzí'.

<sup>7</sup>Tu tuli' ral-la' unödztli' tsca na' chnuzoali' icj ládxi'dau'li', len

clëg lu yöl-la' ruhui'ni queëli' o le run bayúdx, le nadxi'inë' Dios nu runödztli' gdu ladxí'. <sup>8</sup>Dios gac gunnë' queëli' szxónitër ca rquínili' quië gata' queëli' yúgu'të lë na' rquínili', ati' ugá'n queëli' quië gac gáclenli' nu bi ryadzj qui. <sup>9</sup>Lëzca' cni nayúj lu guich la'y, rna:

Gdu ladxë'ë bunödztjë' quegac bunách yechi'.

Nac bë'tecz yöl-la' dxi'i ladxí' queë'.

<sup>10</sup>Dios, Nu runn queëru' bi gaz uzoaru', lenca' bi guil'j gáguru', gunnë' ca' queëli' bi unödztli', le nac ca lë na' nu raz ruzóa, len gunë' ca' ga la'yán le lapli' le nacgac le dxi'a runli'. <sup>11</sup>Dios gunë' ga gáta'tër queëli' yöl-la' tsahui' quië gac unödztli' szxöni. Cni gac, yugu' le unödztli', lë na' quistu' uláz queëli', gun ga la'ná bunách zian: "Xclenë' Dios." <sup>12</sup>Lë na' runödztli' le gaclen bóchi'ru', clëgz güi' quequë' le ta'yadzjnë', san gun ga la'né' xclenë' Dios. <sup>13</sup>Cati' gunli' cni, la'gu'ë Dios yöl-la' ba le gac bë' runli' ca rna didza' dxi'a queë' Cristo ca na' rnalí' runli'. La'gu'ë Lë' yöl-la' ba ca', le nacli' dxi'i ladxí', runödztli' quequë' lenca' quegac yezica' bunách. <sup>14</sup>Lulidzë' Dios la'nabnë' Lë' gáclenë' lbi'ili' le nadxi'icnë' lbi'ili' ni'a qui le buza'tsca ladxë'ë queëli' Dios. <sup>15</sup>Xclenë' Dios, bennë' queëru' tu le nactër lsaca'.

**Yöl-la' uná bë' dë lu në'ë Pablo**

**10** Ta'ná bunách naca' nõxj ladxí' cati' zóalena' lbi'ili', san cati' zoa' zi'tu' ga zoali' rsídxtsquida' lbi'ili' ca ruzuja' lu guich. Le naquë' nõxj ladxí' len

dx'i' ladxi' Cristo, neda', Pablo, ráta'yua' lauli' <sup>2</sup>cui gunli' ga gun bayúdx gsidxda' lbi'ili' cati' gdxina' ga zoali'. Chzoa gsidxda' nup ni' ta'ná runtu' dxin ni lu yöl-la' bunáchz queëtu'. <sup>3</sup>Le nactë nactu' bunách, san clëg racz queëtu' runtu' xchinë' Dios. <sup>4</sup>Yugu' le rneytu' lu gdil-l, cutu nacgac ca le ta'néy lu gdil-l bunách yödzyú ni, san yugu' le rneytu' lu gdil-l napgac yöl-la' huac queë' Dios, le ruguntu' dxin rusnittu' le nalgac qui tu' xöhui'.

<sup>5</sup>Rusnittu' yugu' didza' cunác tu'zxöni ládxi'gac bunách len yúgu'të le tun ga tun ba zxön cuinquë' len le tun ga cutu lumbë'ë Dios. Runtu' ga gac la'ná bé'inë' yúgu'të le ta'zá' ládxi'quë', lë na' tun ga ta'dá'baguë'ë Dios, ati' runtu' ca' ga tunë' ca rnë' Cristo. <sup>6</sup>Töd gunli' le gac bë' nac gdu ca runli' ca rna xtudzë'ë Cristo, soatu' sina' guntu' xzguia' yúgu'të nup ni' ta'dá'bagu' xtudzë'ë.

<sup>7</sup>Ruyuli' le nalá' lahuiz. Chqui' ráquinë' náquinë' queë' Cristo nu bönni' dzaguë' lbi'ili', ral-la' gáquibe'inë' ca' lë ni: Ca na' lë' náquinë' queë' Cristo, lëzca' cni netu' náquitu' queë' Cristo. <sup>8</sup>Cutu ca' rutui'da' zal-la' gdöd bë'i ben ba zxön cuina' ca nac yöl-la' uná bë' budödë' lu na'tu' Xanru'. Lë na' dë lu na'tu' nac quië guntu' ga gacr gdu ca réjlë'li' Cristo, len clëg quië usnittu' lbi'ili'. <sup>9</sup>Cutu rë'nda' gáquili' rë'nda' gun gáxdida' lbi'ili' ni'a qui le ruzuja' queëli' lu guich ni. <sup>10</sup>Nacuá' ni' nup la'ná: "Yugu' le ruzujë' queëru' lu guich Pablo, rsidxnë' len rdínlenë' rë'u, san cati' zóalenë' rë'u runë' noxj ladxi', len

didza' gul-l ru'ë." <sup>11</sup>Nu na' rui' cni didza' ral-la' gáquibe'i lë ni: Ca na' nactu' cati' bi ruzujtu' queëli' lu guich tsal ni zoatu' zi'tu' ga zoali', gactu' ca' lu le guntu' cati' ni' sóalentu' lbi'ili'.

<sup>12</sup>Le nactë cutu nactu' rugu ladxi' quië gnatu' nactu' tuz ca nacgac nup ni' tun ba zxön cuingac. Bunách cunözi nacgac nup ni'. Lu le ta'zá'z ládxi'quë' tu'zöé' ca ral-la' lac bunách, len ta'bequi xbeynë' la' légaczë' tsca nac lë na' ta'zá'z ládxi'quë'. <sup>13</sup>Netu' cutu gunr ba zxön cuintu' ca ral-la' guntu', san ca nacz dxin budödë' lu na'tu' Dios, ati' lu dxin ni, ral-la' guntu' lei ga ni' zoali' lbi'ili'. <sup>14</sup>Chqui' budödë' lu na'tu' Dios dxin guntu' ga zoali', cutu ca' gdöd bé'itu' ca bentu' cati' bdxintu' ga zoali', bentu' lban ga zoali' qui didza' dxi'a. <sup>15</sup>Cutu run ba zxön cuintu' ca nac dxin nungac yezica' bunách, san ca nacz dxin na' budödë' Dios lu na'tu'. Runtu' löz gacr gdu ca réjlë'li' Cristo quië gac guntu' dxin ga zoali' le nacr lsaca', tsca nac le budödë' lu na'tu' Dios guntu'. <sup>16</sup>Ni'r gac guntu' lban qui didza' dxi'a ga nacuá' yöd dzö' zi'tu'r ga zoali'. Cni gac, cutu gun bayúdx gun ba zxön cuintu' ni'a qui dxin nungac yezica' bunách, lë na' budödë' Dios lu na'gac.

<sup>17</sup>Nayúj lu guich la'y le rna:

Nu rë'ni bi gun zxön,

Le benzë' Xanru' ral-la' gun zxön.

<sup>18</sup>Nurujë' dxi'a bönni' cati' rnë' Xanru' nurujë' dxi'a len clëg cati' ru'ë cni didza' qui la' cuinzë' bönni' na'.

**Ca naquë' Pablo, len ca nacquë' bönni' tun cuinquë' gbaz queë' Cristo**

**11** Rë'nda' gua' glenli' neda' tsal ni gu'a didza' lu yöl-la'

cunözi quia'. Gul-zá' ládxi'li' quia'.  
<sup>2</sup>Rui' ladxa'a lbi'ili' ca na' Dioscz  
 rui' ladxë'è lbi'ili', le nacli' ca  
 nacbi' tubi' bi'i ngul ra'bandau',  
 nac gdu ládxi'bi', buschina'-bi'  
 lahuë' Cristo quië utság ná'lenbi'  
 Lëczë'. <sup>3</sup>Rádxida' gdxin queëli' nu  
 si' ye'i lbi'ili', gun ga usanli' ca  
 nadxi'ili'-në' Cristo gdu ládxi'li', ca  
 na' guc queënu Eva cati' lu yöl-la'  
 sina' qui gzxi' ye'i lënu Satanás  
 tu' xöhui'. <sup>4</sup>Cni rnia' le rui'li' latj  
 gdu ládxi'li' nu za' queëli', run lban  
 qui zxba queë' Jesús, le nadzá' ca  
 nac zxba bentu' lban qui netu', ati'  
 rzi' lu na'li' tu bö' len tu didza'  
 dxi'a nadza'gac ca nac Bö' La'y na'  
 len didza' dxi'a na' gzxi' lu na'li'  
 lu na'tu' netu'. <sup>5</sup>Ráquida' cutu  
 nacra' cuidi'z ca nacquë' bönni' ni'  
 náctërquë' blau, ráquili' nacquë'  
 gbaz queë' Cristo. <sup>6</sup>Nazx ca' naca'  
 cuidi'z ca ru'a didza', san cutu naca'  
 cuidi'z ca nac yöl-la' rejni'i napa'.  
 Zian lzu, len zian ca bului'itu' lbi'ili'  
 ca nac yöl-la' rejni'i naptu'.  
<sup>7</sup>Nazx ca' cutu nac dxi'a tu le  
 bena', cutu bi buquizzja' lbi'ili' cati'  
 bena' lban ga zoali' qui didza' dxi'a.  
 Ben cuina' ca'z, san bena' ga gucli'  
 lbi'ili' zxön. <sup>8</sup>Buguna' dxin le naqui  
 quegac yezica' cö' bunách queë'  
 Cristo, le gzxi'a dumí gulunödzejë'  
 quia' lequë' quië guc bena' dxin ga  
 zoali' lbi'ili'. <sup>9</sup>Cati' gzóalena' lbi'ili'  
 len byadzj quia', cutu busaca' zi'a  
 nituli' lbi'ili', san lë na' byadzj  
 quia', gulunödzejë' quia' bóchi'ru'  
 guladxinë' quia', gularujë' luyú  
 Macedonia. Gatga busaca' zi'a  
 lbi'ili', ati' la' tuz ca guna'. <sup>10</sup>Ni'a  
 qui le nac gdu'të li queë' Cristo  
 zoalen neda', cutu soa' dxiz, gun ba

zxön cuina' ca nac lë ni gdu luyú  
 Acaya. <sup>11</sup>¿Naru' ráquitsali' rnia'  
 cni le cunadxí'ida' lbi'ili'? Nözcznë'  
 Dios nadxi'ida' lbi'ili'.

<sup>12</sup>Gúntecza' ca runa' na'a, cui  
 gata' latj quequë' lun ba zxön  
 cuinquë' bönni' ni' ta'né' nacquë'  
 gbaz queë' Cristo len ta'né' tunë'  
 xchinë' Lë' ca runtu' netu'. <sup>13</sup>Cutu  
 ca' nacquë' gbaz nasölë'è Cristo.  
 Ta'zí' yë'è ca nac dxin tunë' len tun  
 cuíngaczë' gbaz queë' Cristo. <sup>14</sup>Cutu  
 ral-la' ubániru' ca tunë' bönni' na'.  
 Lëzca' Satanáscz, tu' xöhui', rulu'  
 cuini ca gbaz la'y queë' Dios, rdë'  
 lu yení'. <sup>15</sup>Qui lë ni na' cutu ral-la'  
 ubániru' chqui' yugu' huen dxin qui  
 tu' xöhui' na' tu'luí' cuinquë' ca nup  
 tun xchini Nu na' nac tsahui'. Udx  
 quequë' ca rajlöz le tunë'.

#### Yugu' le gzxaca' gdi'ë Pablo

<sup>16</sup>Leyúbl rëpa' lbi'ili': Nutu nu  
 ral-la' gaqui nachixi icja'. San chqui'  
 ráquili' nachixi icja', gul-güí' neda'  
 latj gu'a didza' ca bönni' nachixi  
 icjë', gun ba zxön cuina' tu chi'ida'u'.  
<sup>17</sup>Didza' ni ru'a cutu nac le rna bë'è  
 Xanru', san ru'a didza' ca bönni'  
 nachixi icjë', run ba zxön cuina'.  
<sup>18</sup>Nacu'ë zian bönni' tun ba zxön  
 cuinquë' ca nacgac le tunë' lu yöl-la'  
 bunáchz quequë'. Qui lë ni na',  
 neda' ca' gun ba zxön cuina'. <sup>19</sup>Le  
 ráquili' racli' szxöni, gdu ládxi'li'  
 rui'li' latj lu'ë didza' bönni' nachixi  
 icjquë'. <sup>20</sup>Rui'li' ca' latj nu gun  
 lbi'ili' bönni' nadá'ugac, o nu cua le  
 dë queëli', o nu gna be'i lbi'ili', o nu  
 ucán lbi'ili' ca'z, o nu capa' rú'ali'.  
<sup>21</sup>Rutui'da' rnia' lë ni: Cutu bentu'  
 cni queëli' le gdöd bë'i guctu' nöxj  
 ladxi'.

Chqui' zoa nu nac rugu ladxi' gun ba zxön cuini, neda' ca' gaca' rugu ladxi', gu'a didza' ca bönni' nachixi icjë'.

<sup>22</sup> ¿Naru' nacqué' bönni' hebreo?

Ca' naca' neda'.

¿Naru' nacqué' bönni' Israel? Ca' naca' neda'.

¿Naru' nacqué' xzi'n xsoë'

Abraham? Ca' naca' neda'.

<sup>23</sup> ¿Naru' nacqué' huen dxin queë'

Cristo? Ca' náctëra' neda'

zal-la' ru'a didza' ca bönni'

nachixi icjë' cati' rnia' cni.

Béntëra' dxin ca glunë' lequë'.

Gyu'a lidx guia zianr lzu ca gulayu'ë lequë'.

Gulazé'itsqui neda' yu bunách zianr lzu ca guc quequë'.

Gzoa banádx gatia' zianr lzu ca gzoa quequë'.

<sup>24</sup> Gayu' lzu gulaguinë' neda' guid bönni' judío.

Tu tu lzu na' gulaguinë' neda' chënna uruá' lzu.

<sup>25</sup> Tsonn lzu gulaguinë' neda' gba'y.

Tu lzu gululadxë' neda' guiöj.

Tsonn lzu gzoa' tu lë'i barco guc ditj, bötj lu nis zxön.

Tu lzu gzoa' gdu tu yël len tu dza lu nis qui nis zxön.

<sup>26</sup> Zian lzu cati' ni' yu'a nöz, gdöda' gap gzoa' banádx yugu' lu yegu,

len gap gzoa' banádx lu na'quë' gban,

len gap gzoa' banádx lu na'quë' bönni' uládx quia',

len gap gzoa' banádx lu na'quë' bönni' gza'a,

len gap gzoa' banádx lu yödZ,

len gap gzoa' banádx lu latj ca'z,

len gap gzoa' banádx lu nis zxön, len gap gzoa' banádx lu na'quë' bönni' ta'z'í' yë'ë, ta'né' nacqué' bóchi'ru' ta'yëjlë'ë Cristo.

<sup>27</sup> Dxin zxön bena' len budú ladxa'a.

Zian lzu cutu guta' quia' latj gasia'.

Gduna' len gbidxa'.

Zian lzu cutu guta' quia' bi gahua', o ga utsë'i cuina', o lari' gacua'.

<sup>28</sup> Yetú ca', yúgu'të dza ruúbi rugui'ida' le rui'tsca ladxa'a yúgu'të cö' bunách queë' Cristo.

<sup>29</sup> Cati' nu rcuidi', neda' ca' rcuidi'da'. Cati' nu

run ga gchixi gnignë' tu bóchi'ru', rleyda' nu run cni.

<sup>30</sup> Chqui' run bayúdx gun ba zxön cuina', gun

ba zxön cuina' ca nac le nacgac bë' rcuidi'da'.

<sup>31</sup> Dios, Xuzë' Xanru' Jesucristo, gactecz queë' yöl-la' ba. Lë' nözcnë' ru'a didza' gdu'të li.

<sup>32</sup> Cati' ni' gzoa' lu yödZ Damasco, bönni' ni' guta' lu në'ë uládx queë'

bönni' rna bë'ë, lë' Aretas, bucu'ë bönni' gulabó' nisië' quië la'zönë' neda'

<sup>33</sup> san bóchi'ru' ni' guludödë' neda' tu ga ra'a yení' qui yu'u, yu'a

tu bdö'a zxön, guluzötjë' neda' ni' lu zö'ö run chi'i yödZ na'. Cni guc,

bulá' lu na'quë' bönni' ni' gulabó' nisië' neda'.

Yugu' le bului'inë' Pablo Dios

**12** Le nactë cutu ral-la' gun ba zxön cuina'.

Zal-la' cni nac, na'a gu'a didza' ca nacgac

le bului'inë' neda' Xanru' len le

buzéjni'në' neda'. <sup>2</sup>Núnbë'a-në'

bönni' rejle'ë Cristo, chguc chidá' iz

zoa nu bchë' lë' yehua' yubá. Cutu

nözda' chqui' gyijè' ni' lu gdu ca nayá' nabanè' o lu bô' nacczè'. Tuzè' Dios nöznè'. <sup>3</sup>Nözda' gyaziè' latj lach queè' Dios, nazí' lei paraíso. Cutu nözda' chqui' gyijè' ni' lu gdu ca nayá' nabanè' o cutu. Tuzè' Dios nöznè'. <sup>4</sup>Tsal ni' zoè', byönnè' le tun ga nu rubani, yugu' le cudé latj nu güi' didza' qui. <sup>5</sup>Bönni' ni huac guna' lè' xön, san cutu gun ba xön cuina'. Tuz gun ba xön cuina' le rcuídida'. <sup>6</sup>La'naru' guè'nda' gun ba xön cuina', cutu gaca' cunözi, le gnia' le nac gdutè li. Na'a, cutu gun ba xön cuina' le cutu rè'nda' nu gunr neda' ba la'n tsa le ble'i bena' neda', o tsa nac didza' byöni bè'a neda'.

<sup>7</sup>Ni'r, cui töd bë'i gun ba xön cuina' le blé'ida' lè na' tun ga nu rubani, Dios buzóè' lu xpèla'a tu huè' rlatca ca rla ga rnè' yötsi'. Huè' na' guc ca tu le bugún dxin tu' xöhui', busaca' zi' neda'. Cni guc quia' cui töd bë'i gun ba xön cuina'. <sup>8</sup>Tsonn lzu gúta'yua' lahuè' Xanru', gnabda' Lè' ugúè' xhuè'a na'. <sup>9</sup>Xanru' gudxè' neda': "Nactè quiu' le ruzá' ladxa'a quiu'. Uzí'tèru' xbey le ruzá' ladxa'a quiu' cati' rcuídinu'." Qui lè ni na', rudzítjsquida' le rcuídida'. Le rac cni quia', ráclentèr neda' yöl-la' huac queè' Cristo. <sup>10</sup>Qui lè ni na', le nadxi'ida'-nè' Cristo, rudzija' cati' rcuídida', len cati' nu rulídz neda' zi', len cati' bi ryadzj quia', len cati' nu rbia ladxi' neda', len cati' bi rac quia'. Cati' nacuídida', náptèrcza' yöl-la' huac queè' Lè'.

**Pablo rui' ladxè'è bunách  
queè' Cristo nacua' Corinto**

<sup>11</sup>Naca' cunözi le bè'a didza' ca nac le dxi'a bena' neda'. Lbi'iczi'

benli' bayúdx bena' cni. Lbi'ili' ral-la' gunli' neda' ba la'n, ati' zal-la' cutu bi naca' neda', cutu ca' nacra' cuidi' ca nacquè' bönni' ni' nácactèrè' blau, ta'né' nacquè' gbaz queè' Cristo. <sup>12</sup>Yugu' le bena' lu yöl-la' rböz zxön ladxi' quia' ga ni' zoali' nacgac bè' naca' gbaz queè' Cristo. Blé'ili' yugu' le bena', le nacgac bè' len le tun ga nu rubani, len yugu' yöl-la' huac zxön qui yehua' yubá. <sup>13</sup>Tuz le cutu bena' ga zoali' le bena' ga nacua' yezica' cö' bunách queè' Cristo. Cutu busaca' zi'a lbi'ili' bi gunni' le guilj gahua'. Gul-nít lau neda' le cutu bena' cni queèli'.

<sup>14</sup>Chzoa guida' ga zoali' le bunn lzu. Cutu bi gnaba' gunni' quia'. Rè'nda' gunn cuinczli' quia' len clèg bi dè queèli'. Yugu' bi'i huè'ndau', cutu run bayúdx lugáubi' xuz xna'cbi'. Xuz xna'cbi' na' ral-la' lugahuè' xzi'nquè'. <sup>15</sup>Gdu ladxa'a utó'a yúgu'tè le dè quia' len udód cuina' ni'a queèli' quiè gac bi uzi'li' xbey, zal-la' ráquida' cati' nadxi'irda' lbi'ili', zeaj rhuechi' yöl-la' nadxi'i queèli' neda'.

<sup>16</sup>Nózcizli' cutu busaca' zi'a lbi'ili'. Na'a, la'li' gnali' guca' sina', ati' len didza' cunác buzí'a xbali'. <sup>17</sup>¿Naru' ráquitsali' gzxi' yé'ida' lbi'ili' cati' bsöla'a queèli' yugu' gbaz quia'?

<sup>18</sup>Gúta'yua' laubi' bi'i Tito guidbi' ga zoali', ati' bsöla'a-nè' tsaxón len lèbi' bóchi'ru' na'. ¿Naru' ráquitsali' buzi'bi' xbali' bi'i Tito? ¿Naru' cu bentu' la' tuz ca runtu' bi'i Tito len neda', lenca' la' tuz didza' bè'tu'?

<sup>19</sup>¿Naru' ráquitsali' rubíj cuintu' dxi'a lauli' lbi'ili'? Lahuè' Dios rui'tu' didza' uláz queè' Cristo, ati'

yúgu'tè le runtu' nac quiè gacr gdu yöl-la' rejlä' queëli' Cristo, böchi' lza'adau'. <sup>20</sup>Rádxida' cutu gacli' ca rē'nda' gacli' cati' guida' ga zoali', ati' neda' cutu gaca' ca ré'nili' lbi'ili' gaca'. Rádxida' rdil-li' didza' len ruzxé'ili' lza'li', len rleyli' lza'li', len rulíd'z ditjli' lza'li', len rnēli' qui lza'li', len runli' ba zxön len runli' rusbó. <sup>21</sup>Cati' guida' ga zoali', chqui' cni rac queëli', rádxida' gunè' Dios ga utui'da' ca nac queëli', ati' gun bayúdx cödx'a ni'a quegac zian nup ni' glun dul-la' len cutu gulub'í ládxi'gac ca nacgac le cunác dxi'a glunè', len yugu' le gulazé ládxi'què' le cunác.

**Pablo ruzéjni'nè' bunách Corinto  
len rugapè' Dios lequè'**

**13** Le bunn lzu ni guida' ga zoali'. Nayúj lu guich la'y, rna: "Run bayúdx la'cuá' chop tsonn nup lun lna' lau chqui' nu bi uquí lzè'i." <sup>2</sup>Chbuzéjni'da' nup glun dul-la' cati' ni' gzóalena' lbi'ili' le buróp lzu, ati' na'a ruzéjni'da' lequè' leyúbl lenca' yúgu'tè nup tun dul-la', zal-la' ni zoa' zi'tu', rnia': Chqui' guida' ga zoali' leyúbl cutu gaca' nöxj ladxi' huadil-la' lequè'. <sup>3</sup>Rnabli' tu le gac bè' ru'a didza' uláz queè' Cristo. Lè na' guna' gac bè' ru'a cni didza'. Cutu ca' rcuíd'i'nè' Cristo cati' bi runè' queëli', san lu yöl-la' huac zxön queè' runè' bi runè' queëli'. <sup>4</sup>Le nactè gdè'tè lè'i yag cruz ca nu rcuidi', san zoè' nabanè' le zoalen Lè' yöl-la' huac queè' Dios. Netu' ca' rcuíd'i'tu' tsazxón len Lè' san le nactu' tuz len Lè' nabantu',

zoalen netu' yöl-la' huac queè' Dios bi guntu' ga ni' zoali'.

<sup>5</sup>Gul-yú cuinli' chqui' réjlè'li' Cristo o cutu. Gul-sí' bè' la' cuinzli'. ¿Naru' cu nózili' zóalenè' lbi'ili' Jesucristo chqui' le nactè réjlè'li' Lè'? <sup>6</sup>Runtu' löz nóziczli' le nactè netu' réjlè'tu' Cristo. <sup>7</sup>Rulidztu'-nè' Dios rnábitu'-nè' gáclenè' lbi'ili', cui gua'li' dö', clèg quiè urujtu' dxi'a netu', san quiè gunli' lbi'ili' le nac dxi'a zal-la' gáquili' rchixi rníguitu' netu'. <sup>8</sup>Cutu ca' gac tá'baga'tu' le nac gdutè li san gacz guntu' le rajlóz le nac gdutè li. <sup>9</sup>Qui lè ni na' rudzjitu' cati' rcuíd'i'tu' ati' lbi'ili' rdip ládxi'li'. Rulíd'ztecztu'-nè' Dios, rnábitu'-nè' gunè' ga gac gdu ca réjlè'li' Cristo. <sup>10</sup>Qui lè ni na' ruzuja' queëli' lu guich lè ni tsal ni zoa' zi'tu' ga zoali'. Ni'r cati' guida' ga zoali' cutu gun bayúdx usaca' zi'a lbi'ili', uguna' dxin yöl-la' uná bè' nudödè' lu na'a Xanru', le nac quiè utipa' ládxi'li' len clèg quiè usnitia' lbi'ili'.

<sup>11</sup>Na'a, böchi' lza'adau', dip ládxi'li'. Gul-güí' ládxi'li' gac gdu ca réjlè'li' Cristo. Gul-güí' ládxi'li' ca' lè ni rēpa' lbi'ili'. Gul-gác tuz len lza'li' len gul-cóz dxí'adau'. Rnabda'-nè' Dios sóalenè' lbi'ili'. Lè' nadxi'inè' rē'u len runè' ga rbözru' dxí'adau'. <sup>12</sup>Gul-gáp Dios lza'li', tuli' yetuli', unída'li' lza'li'. <sup>13</sup>Yúgu'tè böchi' lza'ru' ni tu'gapè' Dios lbi'ili'.

<sup>14</sup>Rnabda'-nè' Dios gunè' ga gata' queëli' yúgu'tèli' le ruzá' ladxè'è queëru' Xanru' Jesucristo, len gdx'i'inè' ca' lbi'ili', len gunè' ga gacli' tuz len Dios Bö' La'y. Ca' gac.